

# Patin gergasi seberat 150kg!

Sinar Harian 18/9/2018 m/s 12

**Tenaga  
10 penduduk  
diperlukan untuk  
menaikkan  
patin itu ke darat**

HAZELEN LIANA  
KAMARUDIN

PASIR MAS

**S**ekumpulan penduduk di Kampung Tok Sangkut di sini digemparkan dengan tangkapan seekor ikan patin buah seberat 150 kilogram pada jam 12 pagi semalam.

Tangkapan tersebut dilakukan di Sungai Lubok Jong, Kampung Teresek di sini menggunakan kaedah candik.

Wakilnya, Mohd Ghazali Daud, 62, berkata, mereka mengambil masa lebih satu jam untuk menarik ikan tersebut ke darat.

"Sejujurnya kami terkejut dengan hasil tangkapan ini yang merupakan ikan paling besar pernah kami naikkan.

"Alhamdulillah hasil tangkapan ini dijual dengan harga RM15 sekilogram dan setakat ini sebanyak 120 kilogram telah dijual," katanya.

Menurutnya, baki daripada ikan tersebut diagihkan kepada rakan-rakan yang telah terlibat dalam kerja-

ja menangkap hidupan air tawar itu.

Mohd Ghazali berkata, seramai sepuluh orang termasuk dia terlibat menangkap ikan patin buah tersebut.

Sementara itu, Yusof Abdullah, 50, berkata, dia dan rakan-rakannya masih lagi terkejut dengan kejayaan mendaratkan ikan gergasi itu.

"Semasa hendak mendaratkan ikan kami berdepan dengan cabaran besar disebabkan oleh saiz dan berat.

"Namun berkat kerjasama seluruh ahli kumpulan, ikan patin buah itu berjaya kami tarik menggunakan tali ke-tebing sungai," katanya.

Menurutnya, tangkapan ikan patin itu menyebabkan penduduk keluar beramai-ramai untuk bergambar dan melihat secara lebih dekat.

Yusof berkata, kaedah candik yang digunakan itu dengan menebarkan pukat panjang merentangi sungai.

Katanya, ia dilakukan ketika air sungai deras dan memerlukan penglibatan seluruh ahli kumpulan bagi memastikan tangkapan tidak dibiarkan terlepas begitu sahaja.

"Kejayaan ini memberi semangat kepada kami untuk turun ke sungai bagi menangkap ikan.

"Walaupun ia hanyalah hobi, namun semua itu berbaloi apabila memperoleh ikan yang cukup besar," katanya.



Penduduk melihat ikan patin buah yang berjaya ditangkap.



Mohd Ghazali menunjukkan ikan patin buah yang ditangkap.



Ikan patin tersebut dijual dengan harga RM15 sekilogram dan sebanyak 120 kilogram berjaya dijual.

